

院長 e 感傷

1945 年八月，日本仔戰敗，殖民政府退出台灣，換唐山人來界管，但即聲魚溜變龍矣，番薯仔（台灣人）福氣矣，食運矣，出頭天矣，隨人志氣揚揚，按算講後日仔，定著生活幸福矣，逐傢心花焦開，有影愈想愈有影，心肝頭歡喜咧等安呢姓，即个噹中台北 e 頭兄教人，上介重要 e，叨是杜聰明博士，伊做台大醫學院 e 院長，毋但是全台灣醫藥衛生 e 捍頭爾爾（nia6），而且潦落去政治、教育、經濟各方面 e 地界，影響面真大，伊佇民國 34 到 42 年做院長 e 中間，人面真闊，社會長短，出入複雜，其中 e 心苦病疼，恰歡喜笑面，擺會使（可以）看做彼時，智識份子心意念 e 大枝牛角（象徵）安呢。

杜聰明博士，佇日本時代，1922（民國 11 年）做過台北醫專 e 教授，尾也 1936 帝國大學醫學部成立了後，嘛順繼做教授來捍頭，來領導全台灣醫學教育 e 發展，安呢一名透京城，真正喚水會堅凍，光復了後「眾望所歸」，繼落做院長，彼時拵氣魄英雄，金光沖沖滾，真正台灣人做了有起呢！……毋閣呢，人生 e 起起落落真歹按算，擔當杜教授真風光 e 時拵吟（nia6），歹運 e 形跡，「烏牛大影」漸漸單倚來矣！人咧講「好歹利運，三年照輪」杜聰明教授即八年 e 院長生涯，去掃著政治 e 風颳尼，幾落擺 e 噹中，險險兮身心敗亡，艱苦罪卦，落尾也食老 e 時拵，頻若想起來，叨規身軀流清汗，真正捶心肝安呢姓，各位咱茲鄉親侍大，是按怎人人欣羨 e 醫學院院長，會搨（變）做真硬斗 e 艱苦回憶？

彼年 e 八月中旬，杜院長去南投溪頭 e 實驗林出張噹中，佇半路，洵洵聽著日本終戰 e 消息，心肝頭真正歡喜，即聲日本仔猴投降敗北矣，唉！阿本仔甚超過，這是天意。宛那是無法度 e 代誌，算起來咱教授仙兮，自做囡仔時代，叨愛國愛民，關心祖國唐山 e 運命，嘛佇三十冬前加入「中華革命黨」，含心攸命用心計較來勝中原皇漢，安呢燴呱呱，熱嘖嘖，真正「中華兒女」做了有起叨著。

毋閣唐山 e 局勢複雜，陰沈硬斗，毋是汝忠厚土直 e 杜院長料想會到，東南派 e 介石仙，恰西北派 e 澤東仙，「門扇板咧逗袂峇」，發生激烈 e 戰爭，雙方數百萬部隊互相咧肖剗，是拚甲天轟地肉翻，百姓是死傷災難，悽悽溜溜，袂輸另外一場世界大戰全款！杜聰明教授，彼時做台大醫學院 e 院長，人面真闊，一寡社會長短，空空縫縫代誌，佇朋友摯接 e 噹中，略略也感受國共內戰失利 e 壓力，嘛知影唐山來台 e 官兵，素質無好 e 烏暗面，伊漸漸失望矣，漸漸激恬恬，無話無句毋敢甚講話，到尾溜也，甚至會驚惶會閃避，做官做臄，毋知會惹禍就身抑未？真正腳尾焦麻痺去矣！心肝頭不時有咧想，日本好抑是唐山好？

台灣光復才一冬爾爾，社會混亂散赤，接收 e 唐山官員，兵士貪污腐敗，食錢歪膏，真正互台灣人看破腳手，也叨官民衝突食力，規粒台灣島，袂輸活火山全款，隨時會爆發安呢姓。民國 36 年 2 月 27 日，院長落台南參加醫師大會，南北二路，社會氣氛愜搭恐怖，不時有人來給咱教授 tok 頭（提醒），「咁院長仙兮，言論愛注意，安全愛注意，外口隨時會危險安呢，「知影啦，道謝！」，27 日彼暗仔，教授坐火車透暝拚返來台北，到新竹站 e 時拚，有一陣人夯刀夯棍真正想氣，大聲咻喚衝入車廂內，欲扑“阿山兮”，彼時拚杜教授拄好恰日本人河合教授全車咧開講，彼陣人知影伊是日本人，才無給嚙嚇，害杜教授驚一下面仔青恂

恂，真正好佳哉！

火車駛到萬華車頭 e 時拚，全部旅客落車，彼時規个台北城，一四界暴亂、火燒、扑人，情勢真正危險，杜聰明一下落火車頭了後，知影代誌食力，趕緊拚到好朋友呂阿昌醫師 e 倚厝（住家）去避難，才袂互外遐暴動 e 民眾來給誤會，「來！來，聰明仙，緊入來，昨暝規台北城暴動，扑規暗，燒規暗，一四界真危險，唉，汝哪會來茲？」好朋友阿昌仙哪捧茶哪接待老朋友，「也叨落下港，拄好坐車起來吟（nia6），無疑悟台北會迤尼亂」「唉！阿山仔官烏白來，引起百姓 e 反抗，看來規台灣南北二路，冤傢噲一直滾開 e 款！」「哎！但萬項卡注意 e！卡張弛 e！匿踎安全 e 所在卡實！」咱杜院長一直佻阿昌仙開講到下晡，才連絡著校方派人，來接伊返去福州街宿舍安呢。

二二八期間，台灣人佻阿山（外省人）e 感情，洵洵遂來惡化，互相仇恨互相驚惶，尤其是 3 月 9 日、10 日清鄉大屠殺了後，二片閣卡攏無退縮 e 空縫，致使講冤仇一直滾開，一直延燒落去，久久袂消退安呢，3 月 9 日，透基隆登陸 e 「鎮暴」福州兵團 e 阿山兵，以優勢 e 武力，對台灣百姓無情 e 屠殺，互院長真正著驚，伊想閣再想，實在想袂曉，對東京話 e 民族佻北京話 e 民族，按恁差別迤尼大？佇即擺清鄉 e 武力鎮壓當中，有真贅杜教授 e 好朋友，大學問家大事業家，嘛真冤枉被剖死，教授目屑流袂離，真正捶心肝，嘛對唐山來 e 阿山勢力，著驚搭底矣！一切恬寂寂，公共場所毋敢加講話矣！

杜聰明雖然身份是「二二八處理委員」，有官方 e 身份，嘛有民間 e 崇高地位，宛那被列入殺滅 e 名單之中，家己人剖家己，但這是欲按恁解釋，三月十日有一工早起，佇外口真危險 e 時拚，吳鴻祺律師（今吳伯雄叔父），趕 yaya 喘

wewe，拚來台大病院，問講「咱杜聰明仙有代誌否？」「啊！道謝汝 e 關心，教授無代誌啦！」，「安呢我叨放心矣！」，對吳律師安呢熱心關懷，教授是勞力再三，感恩閣再感恩，臨走 e 時又閣誠懇給吩咐「教授啊！汝身份特別，聽兮講頂司有給汝列入烏名單呢！千萬細膩細膩！」「道謝」，但教授看著吳律師離開 e 背影時，宛那心中暗唸祝福，也叨街路外口真亂，奔槍 e 山兵仔恰心狂火焯 e 民眾，不時叨咧衝突捕拚，教授宛那煩惱在心。

無疑悟，二工了後，杜院長接著消息，吳律師佇拜訪教授了後，家已顛倒去互阿山兵仔劊死，教授著驚，面色反白，目油雙杠流，規箍人搵（倒）落去，天烏目眩，久久講袂出話。唉！平平同胞 e 唐山人，嗒會迤尼惡毒殘忍？台灣人啊！台灣人！祖國啊！祖國！欲按怎叨好？無外久又閣知影文學院院長林茂生博士，宛那互阿山兵扑死，即聲斯文杜聰明支載袂稠矣！真正起彎奔狂矣！心肝頭咧想，台大文學院長慘死，也我身為醫學院長，咁袂危險？

好啊！心肝殘殘趕緊逃亡哇路矣！即條老命卡要緊，3 月 13 日，杜教授開始哇路（逃亡）矣，四界藏匿，來逃避阿山兵 e 追殺，伊一下逃走，醫學院方面「群龍無首」亂嘈嘈，尾也，校長陸志鴻真正想氣，依「棄職逃亡」罪行，給免職處份，另外由嚴智鐘教授代理醫學院院長。四十工了後，陳儀 e 長官公署撤消，改由委魏道明 e 省政府來捍頭，氣氛慢慢放另溫和，杜院長才敢捅頭出面，重出江湖安呢！

即段逃亡哇路 e 日子，杜聰明佇北投，滬尾山頂（三芝）、茶山、桃園大溪，四界流浪匿藏庄腳山頂海邊仔，蹣草寮仔食粗穿醜，吞忍閣再吞忍，來避開即場 e 惡夢，伊是一个學者，知識高超學問飽飽，經過即擺二二八 e 災難，對國家民

族 e 政治立場，定著有信心動搖 e 可能，原本掠做講阿本仔是異族，全心全力用心計較來騰唐山人中國，毋閣唐山人，遂對台灣人迤尼惡毒，但台灣人簡那孤兒 e！無人疼痛以上，是欲倚啥人卡好？中國啊日本！日本啊中國！這是院長即氏人頭一擺心情大矛盾，久久無法度解決 e 代誌，佇即段「非常日子」e 歲月，宛那淡薄也有悟出人生 e 道理！

彼年院長 55 歲矣，算講漸漸老囉，教授想起少年 e 時拵，叨真正感慨，伊一世人用心計較來騰唐山人，中國人，按怎食老迤尼下消，四界來匿位走跳，卸世卸界，伊想起三十三年前冒著性命 e 危險，遠走北京暗殺袁世凱 e 代誌，又閣想起日本留學時加入「中華革命黨」e 豪情壯志，但即嗎是咧搨啥魴啦？伊想閣再想，洛尾也伊解出四條咱台灣所在可能 e 前途。(一)台灣可能佻中國合併，即嗎 e 話是「統一派」。(二)台灣可能獨立，親象朝鮮仝款，即嗎 e 話是「台獨派」，也叨台灣人多數講台灣話，佻北京話、東京話無仝款。(三)台灣可能先互美國來託管，有代誌以後才閣講，也叨台灣屬太平洋戰區，毋是中國戰區，國際上強兮提去食安呢。(四)台灣暫時先「拜託」日本管一暫仔，來維持地方 e 治安，尾溜也才閣由住民佻國際決定。

以上四項可能，雖然沒想真周到，毋閣國際情勢真正現實閣硬斗，有一寡代誌，毋是咱台灣人會凍來決定 e，最後 e 結局真稀奇，以上四項攏無臆著，伊是「佇美國佻日本 e 支持以上，由主張統派 e 浙江人蔣介石來台灣統治，執行實際獨立 e 現象」，亦叨是講，頂頭四項可能，完全無實現，嘛完全有實現，即个矛盾 e 事實，佇世界 e 歷史咧看，咱杜聰明博士潦落即个深堀咧做官，宛那驚悍閣刺激！疼台灣？愛中國？矛盾矛盾，永遠 e 矛盾！

二二八代誌，對院長來講，是頭一擺心情大矛盾 e 衝擊，繼落 e 瞬吟，又閣

有卡大條 e 問題，連肖繼互咱院長心苦病疼，大傷腦筋，咱教授即八年 e 院長生派，真正是「如坐針氈」，硬斗閣艱苦 e 乏搭款，自古以來做官做甲迤尼歹命 e，宛哪無幾口灶叨著，噹時仔（原來），台灣 e 問題，毋但是「中國、日本」e 舊問題爾，另外佇無形 e 噹中，又閣啟入去世界性 e 衝突「資本主義恰社會主義」e 揀拚議題，閣卡歹紡，即二个主義 e 戰爭、鬥爭，佇歐洲已經四五十冬矣，尤其是俄國，「血流成河，動搖國本」，咱台灣所在，定著無法度閃避即个思想潮流，佇日本時代，有真賢優秀 e 台灣智識份子，早叨嚮往社會主義 e 理想，尹一心一意同情茲「勞苦大眾」散赤人、趁食人，宛那有伊 e 背景佇 e。

* * * * *

杜聰明透民國 34 年秋天，做台大醫學院 e 院長，到民國 39 年 3 月，蔣介石將軍復行視事，攏總有四冬半 e 時間，即段時間，拄好是唐山所在，國民黨恰共產黨發生激烈內戰 e 悽慘日子，四百萬兵戰二百八十萬兵，即个規模比歐洲戰役德軍扑俄軍、法軍閣卡擴大，國共雙方犧牲慘重，即方面點點滴滴 e 消息，不時嘛灌入去杜聰明院長 e 耳空內，院長不止也驚惶，伊是巧巧 e 人，定著知影病院內底有袂少 e 社會主義 e 信仰者，尹無一定是共產黨員，毋閣年久月深查落去，到時拚國民黨若來掠共產份子，無定著我杜聰明嘛會牽涉入去，到時若袂脫身，即聲叨害溜溜，衰甲叫毋敢安呢！咱杜院長是愈想愈驚，即層災厄，毋知欲按怎消透才好勢，唉！做官做官，好看頭爾，舞著即个空縫，有影互汝頭殼摩咧燒安呢！噯才 e 瞬吟，院長非常敏醒張弛，絕對無沐政治 e 代誌，來求自身 e 安全。

咱跋白 e（講實在），彼四冬半內，佇台大病院內底，確實潛伏袂少 e 共黨

份仔，第一款人是「老台共」，原本佇日本時代叨思想左傾「滿腦仔勞苦大眾，窮人翻身」e 共產份仔，尹恰唐山毛共無直接關係，毋閣會搭順風車來夯懸聲勢，第二款人叨是「二二八殘餘 e 台灣人智識份仔」，也叨受著 228 事變 e 迫害，尹即陣人對白色祖國徹底 e 絕望，姑不而衷，投入紅色祖國 e 懷抱，想講有一工，看有法映共產來扑國民黨來報仇安呢！第三款人叨是政治投機份子，尹看著唐山大陸地界，共軍一直打贏國軍，台灣早慢會互策去配，但西瓜倚大并到底也，心肝頭掠坦橫，先倚靠紅色祖國，到時拵倘卯一塊仔好空兮安呢！

各位咱茲先覺好朋友，民國 38 到 39 年中間，杜聰明教授做醫學院院長，實在是真硬斗真艱苦，病院份仔複雜，員工真贅，定著無法度一一考核，伊做國民黨 e 官，是無法度偏坦共黨份子，抑無到時拵查落，罪過真重，毋閣嘛毋敢甚偏坦國民黨，抑無彼時，國軍兵敗如山倒，萬一共產來管，嘛有可能受著報復，院長雙頭為難，真正艱若安呢！伊是欲按怎來矯撼（處理）？

致使講杜院長，頻若下班返去福州街宿舍 e 時拵，叨憂頭結面，罕咧有笑容，心肝頭 ut 悶苦苦袂消透，伊透過真贅管道，知影國民黨 e 軍隊佇大陸戰爭失利，傷亡慘重。民國 38 年初，東北遼西大會戰、平津大會戰、徐蚌大會戰，攏總失敗，毛澤東槍甲夯袂稠，佇 38 年 4 月渡長江，佇四個月內，連肖繼攻落上海、福州、湘南、海南、江西……，民國 38 年 10 月 1 日，佇北京正式成立新中國 e 政府，彼時全國除了台灣、四川、廣州外全部淪陷……院長驚甲疲疲搐，遂工咧吐大喙，厝內 e 人，欲哪會知影伊 e 心苦病疼？伊嘛聽著一个謠言，共產按算民國 39 年辣天（夏天）欲進攻台灣島，毋知有影否？

叨安呢，蔣介石總統唐山地「大勢已去」，自那佇民 38 年 1 月 21 日下野負

責，由李宗仁代理，落尾也局勢惡化，國民黨政府自那佇民 38 年 12 月 8 日遷至台北，軍政大員、武器黃金、故宮寶藏各類人才……，基隆港恰高雄港，載來一船閣一船 e 逃難民眾，台灣彼拚才六百外萬人爾，即嗎欲飼一百萬外來難民，有影真硬斗叨著，即段時間前後，台灣經濟崩盤，官廳兮姑不而衷到地也，發行新台幣，四萬換一籮，台人 e 財產「一暝中間，盡臭礁去」矣，杜聰明對未來 e 日子，真無信心、難民 e 湧入，經濟 e 破產，中共 e 攻擊，官員 e 低路……，有一粒頭二粒大！

政府遷台了後，無外久代總統李宗仁，看兮毋是勢，驚死驚逐，自那邇去美國逃避，算講「阿匏跟港」叨著，蔣介石自那順即个勢，佇「全民擁戴之下」，佇民 39 年 3 月 1 日「復行視事」，閣再就台做總說來安定民心，維持局面，戰事方面，也叨民 38 年 10 月古寧頭大戰後，共產部隊無海戰 e 經驗，海潮流水算毋著，大批共軍戰死灘頭，國軍大贏，暫時阻擋共產 e 攻勢，互老蔣 e，喘一口喟（khui3）安呢！

民 39 年 3 月初，蔣介石復行視事，干礁二十工了後，叨成立「總政戰部」，專門掠匪諜，異議份仔，即个空課由小蔣阿國仔來捍頭，佇非常時期，以高壓政策，嚴格來掠共黨份子恰嫌疑者，嘛關殺袂少 e 人，咱杜院長三年前經過二二八 e 大艱苦，即嗎又閣看著軍方迨尼嚴格咧掠人，心情定著真驚惶，伊咧做台大醫學院 e 捍頭，毋知佗一工會惹禍就身抑袂？若準病院內底有共產份子，到時拚欲按怎處理才好勢？唉，愈想愈驚安呢！

* * * * *

二月日了後，代誌發生矣，1950年，民國39年5月13日下午，保密局一陣特務，婁吉普車到台大病院，強迫進入院長室掠人，透內科主任許強博士，鼻喉科蘇友鵬醫師，眼科主任胡鑫麟醫師，皮膚科胡寶珍醫師，攏總押走，講尹思想左傾。參加敵偽組織，欲實行軍法審判，另外一位郭秀琮醫師，嘛佇嘉義所在互人掠著，仝齊送軍法。

即个時拚，醫院院長魏火曜，大粒汗細粒汗，真正緊張，趕緊叩電話互頂司醫學院院長杜聰明，「長官，即嗎有七、八个保密局人員，端坐佇院長室，尹欲掠人，包含內科主任許強、眼科主任胡鑫麟、鼻喉科蘇友鵬、皮膚科胡寶珍，現場氣氛沈重，代誌真歹紡，是欲按怎矯才好勢？」杜聰明含著目淚，頭殼茫茫楚，心苦病疼給應「知影啦！進前頂司有來佻傅斯年校長講過，欲來病院掠匪諜e代誌，非常時機，這是無法度e代誌，才拜託汝好好也處理，另外我即引會通知尹家屬，僱物件倘拍官司，這是軍法審判，真正食力安呢，耶麼才拜託汝現場處理……」。

繼落e瞬吟，魏火曜院長自那叩分機，互即幾位醫師，麻煩尹來院長室一泄，有重要e代誌欲交待，即醫生、胡鑫麟、許強、蘇友鵬、胡寶珍，感到真奇卡，病院e規矩，自來叨毋捌佇門診e時間，召集醫師入院長室辦代誌，若有代誌，派工友來通知一聲，抑是電話講一聲叨好勢，竭竭是下班中晝歇暈再聚會嘛袂慢，按怎叨趕趨趨，嘸嘸叫？咁是欲掠人是毋？唉！互汝臆著矣！時機醜醜，阮保密局叨是欲掠人，抑無汝是欲按怎，……等尹一行人進入院長室時，發現氣氛凝重，另外一陣穿中山裝e青份人，面色鐵青坐佇膨椅肖等，即聲慘啊！尹無事不登三寶殿，即聲正實有代誌矣……。

保密局人員佻四位醫師離開了後，魏火曜院長坐佇院長室膨椅咧喘大喟（氣），也叨代誌甚過恐怖，其過了突然，伊眼前一片 e 空白，頭殼昏迷，清汗流甲規身軀，真正腳尾焦冷去矣，毋管掃塗腳 e 阿桑按怎問話，伊恬恬無半句，面仔青恹恹，唉！今仔日 e 天花板感覺千斤萬重，向伊砥（壓）過來，心肝真艱苦，時間一秒一秒過去……，唉！伊實在想袂曉，保密局 e 人員，按怎用迤尼粗魯恐怖 e 步數，來病院掠人？連我這做院長 e 人嘛面仔焦失，但代誌舞甲迤大條，明仔載，後日……，是欲哪處理？是欲哪矯互伊好勢？茲大醫師 e 家屬若來「茹」（糾纏），我是欲按怎應付？是按怎事先哪會無先通知？杜聰明佻傅斯年真無夠朋友，害我當場漏喟（氣），無打緊又閣噯應付社會佻家屬 e 責備，哎！欲按怎？欲按怎？

事實上，即款代誌，傅斯年佻杜聰明，無法度事先給魏院長通知，也叨戒嚴時代，杜聰明有伊 e 苦衷置 e，伊一方面袂使違反政府 e 命令，一方面目矚金金愛看著好朋友洵洵去互人掠去，伊啥著目淚，身心受著煎熬 e 艱苦，絕對袂比汝魏院長卡少，而且政治局勢真醜，共產兵隊聽兮講後月日叨欲攻扑台灣，汝甘知？總是大時代 e 悲劇，咱攏拄著矣，但港潦落啊！這宛那真正無法度安呢！

光復已經欲五年矣，毋閣「總政戰部」嘛才成立二月日爾，掠匪諜 e 代誌，國共戰事 e 落坑，對茲斯文人來講，甚過了硬斗，甚過了突然，啥乜人會想到遐恐怖 e 代誌，而且社會主義 e 思想，佇日本時代，即已經真流行，又閣經過 228 洗禮，真贅智識份子對白色中國 e 絕望，轉向紅色中國，這宛那是時代 e 現象。

台大病院掠人 e 代誌，佇進前一禮拜吟，特務機關叨有暗中派人佻傅斯年校長摯接，尹講為著台灣 e 安全，絕對噯肅清共產黨 e 毒害，頂司有欲入台大病院，

掠共產份子，望汝體諒，傅校長是讀冊人，做人忠厚真有行情，馬上給碰倒返去，「汝若掠人，咁有哈證據？對醫生人袂使無禮e，抑無，我校長欲哪倚起？」特務應「簡單e證據是有啦，根據台共蔡孝乾e供詞，尹茲人雖然無武力叛亂，毋閣有加入組織，望汝諒解！」「袂使入病院烏白掠人，愛用傳訊，儘量簡單化，絕對袂使冤枉，……」特務為達成任務，對傅斯年所有e條件攞總答應，臨行e時拵又閣拜託校長絕對保密，抑無消息走漏，歹人逃走，到時拵無法度向頂司交待，安呢叨慘矣！

無外久e中間，傅校長私下佻醫學院院長杜聰明，秘密參詳即項代誌，杜聰明一下看著烏名單吟，心肝內大驚，血壓燴到二百二，即聲清汗拵甲規尻脊，腳尾焦冷去矣，伊目調反白，規箍人強欲搵落（倒下）去矣！啥乜，欲掠e人，全全攞是逐工見面e同事佻下屬，我聰明仙欲哪目調金金，看尹掠去關去剖？毋閣即个時拵，傅斯年哈著目淚佻姑晟「代誌歹訪，頂司e壓力足重e，千萬袂使走露風聲，抑無「包庇匪諜，與匪同罪」，到時拵我家已措皇金，宛那無法度……」各位先覺好朋友，到底杜院長會來保全家已犧牲朋友，抑是會犧牲家己，來通知朋友逃走？

五月初彼幾工，杜聰明返來福州街宿舍e時拵袂食袂睏e，心肝頭重重重，毋知欲按怎才好，伊陷入極端e矛盾，彼个時拵，中共軍隊攻扑台灣已經「箭在弦上」，一二月日內隨時渡海攻台，杜聰明咁敢得失暝日逗陣e同事？咁敢得失頂司國民黨政府？咁敢得失馬上攻擊e共產勢力？抑無到時拵互人報復，欲按怎叨好？咱杜院長暝目煩惱，身體又閣瘦二~三公斤，氣色無好，厝內e嫫囡，定看出伊心情沈重，毋閣伊表面上宛那激笑笑，無啥愛講叨著，唉！這是伊光復以來，第二擺生死交關e大矛盾（頭一擺是二二八），若矯袂好勢，泛勢即條老命

休去嘛無的確哩！所以講伊真正小心真正細膩安呢！

烏名單頂頭寫，官廳兮欲掠台大病院內底六個醫師，大部份攞是「喚水會堅凍」e 大腳（大人物），許強博士、胡鑫麟博士、胡寶珍醫師、蘇友鵬醫師、翁廷俊醫師、郭秀琮醫師，茲人攞是杜聰明 e 同事佢屬下，逐工見面，感情深厚，會使講透細漢看到小漢，但即聲代誌歹紡矣！人咧講「一面是溝，一面是圳」，人若左右為難咧做石磨仔心，是真艱苦 e 代誌(一)伊若給烏名單醫師暗示，遐醫師定著逃亡咵路，安呢欲哪佢頂司交待？到時拵頂司火焯，給汝安一條「包庇匪諜」安呢叨規組害了了啊！(二)伊若無給講出來，叨目調金金人傷重，活活看著十外年好朋友落難淒慘，是欲哪對尹本人佢家屬來交待？另外一點，中共兵隊，按算一月半了後，渡海攻台（民 39 年 7 月初），到時拵汝幫忙國民黨陷害「中共同志」，共產宛那會安一條罪來報復辦汝，全款互汝規組害了了！也但杜聰明是欲按怎矯，是欲倚佗一芡？唉！做即款「大官」，真正無做無代誌，愈做愈艱苦，心肝頭有淡薄也後悔安呢！

民國 39 年，即年對台灣人來講，是一個悲情哀傷 e 年代，3 月 1 日蔣總統就任，3 月 22 日左右成立「總攻戰部」，專門掠匪諜，7 月初中共準備渡海攻台，所以佇 5 月中旬來掠台大醫師，絕對會產生爆炸性 e 後果，所有 e 責任，即聲咱杜聰明院長是閃袂離安呢。這按怎講？5 月 15 日到 7 月初嘛才一月外日爾爾，但日子一工工 e 逼近，這表示著一方面拵掠去 e 醫生、共產份子，危險淒慘，毋閣對另外一方面講，7 月初了後共產攻台了後，可能嘛會對國民黨來報復！但雙方攞無抽退 e 空縫，氣氛樞搭，杜聰明仙一粒無殼二粒大！

所以講 5 月 13 日台大掠人，前進幾落工，杜院長 e 心情穢醜，伊去病院巡示 e 時拚，逐擺若看著烏名單 e 醫師時，心肝頭叨感到真歹勢，真對不起尹。唉！視十年 e 友情啊！是按怎距離吊赫遠？即款生離死別 e 空縫，有影想落會捶心肝，毋閣佇戒嚴制度感覺以上，咱聰明仙宛那恬恬無半句，一尾魚落鼎，隨在汝剖，隨在汝摟（切），真正姑不而哀安呢姓。

咱詳細給檢驗，到底即批互保密局掠去 e 台大醫師，咁有犯著啥乜天條大罪是毋？無啦！尹干礁是思想犯爾爾，尹並無用武力佻國民黨揸拚，不而顧呢，尹規頭殼 e 社會主義思想，去犯著國民黨 e Khia 爾爾，佇彼時共產黨兵隊，隨時會併吞台灣 e 危險時機，拄第一線來做肉餅（砲灰）做犧牲品叨著，為著思想，尹以卑微 e 身命來對抗不義 e 政權，後世 e 人會做公平 e 審判，抑無，汝講茲醫生有共產思想，罪該萬死，毋閣頂司大頭傢蔣經國，細漢留學俄羅，嘛是參加共產，同情勞苦大眾，嘛佻尹老父蔣介石絕裂安呢？所以講這毋是共產無共產 e 問題，完全是政治壓迫叨著。

內底 e 許強博士，伊是內科主任，學問真好，即擺去互軍方掠去審判，有影真冤枉，伊是田庄人，宛那艱苦人出身兮，佇日本時代，叨有「勞苦大眾，窮人翻身」 e 社會主義思想，伊同情弱者，釘根真深，是竄筋入骨撼撼鑽，「為思想為主義，死而無憾」，即款人先天 e 背景來，加入共產組織，宛那是真正常 e 代誌，另外眼科主任胡鑫麟醫師，學問真好，學生時代叨是社會主義 e 擁護者，一个稍寡思想犯爾，竟然會拿掠去軍法審判，唉！真正擔當袂起啦！恁父無赫尼偉大啦！

另外耳鼻喉科蘇友鵬醫師佻皮膚科胡寶珍醫師，尹 e 背景真肖倚，政治思想定著嘛差不多，茲 e 智識份子，一工到暗看冊，看甲入迷，有家己 e 思想，並無用武力暴力謀反，用軍法審判，甚過超過啦，猶有防疫部門 e 郭秀琮醫師，士林好額人 e 困孫，伊是典型 e 資本主義 e 特權者，毋閣天生同情散赤人艱苦人，規頭殼 e 社會主義理想，又閣毋驚艱苦流血流滴搶第一，受著二二八事變 e 刺激，對白色祖國徹底 e 絕望，定著漸漸來趨向共產彼引，汝講伊反叛家族亦好，反叛社會亦好，反叛國民黨亦好，伊擺放外外伊，意志堅強，忠直義氣，願為理想奉獻犧牲性命，真無簡單！

以上即幾位醫師，攞佻杜聰明感情真好，尤其是許強博士，伊是帝大醫學部第一屆，頭殼好、能力強，杜聰明印象特別深安呢，即五个台大醫生，佇民國39年5月互特務掠去軍法審判，蹠看守所收押，即个時拵台灣 e 局勢真正食力，會使講一工一工來惡化，蔣介石真正煩惱中共渡海攻擊台 e 代誌，彼拵國際上有風聲講，中共可能7月初，以武力攻台，若安呢講，這是真食力 e 代誌，這離台大醫師去拿掠去彼工5月乃來講，俵一月半日爾爾，伊一工一工逼近，迨尼複雜大條 e 軍法審判。絕對無可能一月半日叨完成，安呢若是事實，佇國防部猶未判決前進，真可能共產叨已經占領台灣矣！到時拵，不管國防部，碗膏部攞無效，橫直恁父共產拳頭母上大啦，若安呢講，即批「待罪」e 醫師恐驚也會現出一條生路嘛無的確哩！

干礁俵一月半日爾，台灣可能變色！但即聲杜聰明又閣煩惱矣！真正是驚甲腳尾焦冷去矣！唉！我哪會迨歹命啦！第一回生死痛苦是二二八 e 祖國矛盾，第二回生死痛苦是，目睷金金看著好友同事學生去拿掠軍法審判，但即回是第三擺，杜聰明被迫選擇政治立場，到底是欲倚國黨，抑是共產黨？照目前

e 情勢惡化，真正月外日可能共產會來管，若無量早表態，到時可能會互人報復，也叨汝 e 學生佢同事互國民黨糟躡，「對方勢必報復」安呢鉅角才矯會返來呢！這對杜聰明來講，是生死存亡真正恐怖 e 代誌，各位！杜聰明 e 選擇是按怎？

致使講杜聰明咧做石磨仔心，真正「左右為期」，伊即嗎若甚倚國民黨，一月日了後共產黨來，一定會報復，伊若甚倚共產黨，目前 e 國民黨絕對有法度依匪諜罪給殺滅，伊定著嘍做一個正確 e 選擇，事實上杜聰明佇少年 e 時拵，卡倚國民黨，伊嘛加入中華革命黨安呢，一月日了後，民國 39 年 6 月 15 日，消息傳來，中共 e 兵隊拍算 7 月 1 日左右，欲進攻台灣，即个時拵，杜聰明真驚，國民黨嘛真驚，全省七百三十萬人，攏嘛真驚惶，半月日後台灣局勢會按怎？峯掠去軍法審判 e 台大醫師。命運按怎，是毋是會敗部復活？宛那無人知影！

中國共產黨佇 1949 年 10 月 1 日成立新中國政權，北京 e 街頭響出一片 e 歡呼！為著欲「完成全國統一大業」，決定派兵解放台灣，聽兮講日期大約 7 月 1 日左右，準備 50 萬兵員，強力征召漁船佢軍艦。另外用謝雪紅等老台共，佇上海訓練三千名 e 指導員，一旦就陸了後，「分配互各地每里一名，做基礎幹部，好好安撫百姓」，即款代誌台灣知影，美國知影，日本嘛知影，但台灣是欲按怎才好？

唉！天公伯仔逗感應，佇台灣「風雨飄搖」上介危險 e 坎站，時局發生了戲劇性 e 變化，7 月 1 日欲攻台灣，毋閣 6 月 25 日韓戰爆發，美國第七艦隊守護台灣。干礁差一禮拜吟，真正險險險，人咧講「好歹利運，三年照輪」，阿共仔

莉耶耶，橫長直破燴呱呱，暗路行贅，宛那會踢著鐵枋，即聲去舞著啄鼻仔猴（美國人），定著塗塗塗，有影食緊撞破碗，世間長短，真正互汝袂鐵齒 e！

也坦韓戰爆發了後，中共恰美國肖剖，所有 e 力量移去北方「抗美援朝」，台灣 e 危機暫時減輕，而且第七艦隊保護稠 e，阿共仔 e 嘛毋取甚聳鬚安呢，即个時拚。國民黨「轉危為安」，伊祛著紅米，咱那態度返強硬，對「共黨份仔」絕對掠，關、剝，無咧客氣，坦即聲醫院彼陣「匪諜醫生」慘矣！

坦杜聰明一下聽著「第七艦隊護衛台灣」，美國支持台灣，恰中國共產黨拚生死，即聲心情卡安定矣！唉！押即注（dus）甚硬斗，恁父即條命險險兮休去，做官做戇無卡蹉，逐工安呢煩惱袂食袂睏 e，實在有夠嚙氣（不勝感慨），毋閣杜院長，逐工嘍上班，伊知影國民黨態度轉硬轉狠，為著欲剖雞敬猴，一定會對茲「匪諜醫師」伸出毒手嚴厲判刑，佇厝內，佇學校，杜聰明暝日搯兮咧等，毋知佗一工尹 e 運命按怎？

民國 39 年 9 月 21 日，國防部判決，許強、郭秀琮，即二位醫師。雖然無武力叛亂，毋閣參加匪偽組織，意圖顛覆政府，處以死刑。另外胡鑫麟、蘇友鵬、胡寶珍思想左傾，附合敵偽，送外島關十年徒刑，杜聰明佇病院，看著報紙 e 新聞，目淚四滴垂，傷心搭底。規箍人強欲搵（倒）落去，唉！時機恐怖，我聽明仙叨無法度給汝保護，宛那有姑不而哀安呢！望恁保重啊！台灣牛！……叨安呢，即批政犯佇看守所中，受盡不仁道 e 待遇，袂食袂睏 e，即个時拚離二二八事變已經三年半矣，宛那賊無人權安呢，二月日了後，11 月 29 日透早五點，許強、郭秀琮被送去馬場町，佛祖含笑來相迎……。

即半年來 e 政治煎熬，杜聰明是心苦病疼，虐甲袂食袂暍 e，十二條神魂早著飛到三界天外，真正「如坐針氈」，生不如死，但即嗎代誌告一段落矣，註該按怎叨按怎，即聲「鐵釘釘大樹」，我聰明仙宛那嚟去消透消透，暫時離開即个傷心 e 所在……。

二十工了後，亦著是民國 39 年 12 月 17 日，杜聰明提著 WHO 獎學金，去美國遊學半年，……，飛機離開松山機場 e 時拵，心肝宛那撲撲彩，伊看著雲下腳 e 基隆河、大屯山、台灣海峽，想著光復即五年以來醫學院院長官場生涯。感慨無量，一時目燒鼻酸，喉管溼起來（哽咽），即幾年 e 代誌，又閣親象走馬仔燈全款，一幕又閣一幕，透面頭前閃過，……，光復時迎接祖國，嘴笑目笑心花焦開 e 場面，……，二二八生死關頭 e 恐怖，頂司欲來病院掠匪諜醫師 e 艱苦，好朋友佇馬場町蒙佛祖含笑相迎，……，卡早有咧想，台灣可能統一，可能獨立，可能美軍託管，可能日本暫管，唉！即四項攏無實現，嘛攏有實現，真正簡那咧做夢全款！最後 e 驚惶，驚共產攻台，尾溜也遂韓戰爆發……。

飛機佇東京降落，歇暍三點鐘，咱聰明仙慧慧柴柴坐佇遐，心肝毋知咧想按怎？伊有捌佇日本留學六年，對伊來講，即擺「舊地重遊」，並無帶來歡喜 e 心情，伊頭殼犁犁，想起好朋友，吳鴻棋、林茂生、許強、郭秀琮 e 過往，心肝頭傢出一絲一絲 e 感傷……。（全文結束）